



L'anteriu cusseglier federal Joseph Deiss ha avra la 66avla Assambla generala da l'ONU.

KEYSTONE

# Vegn la Palestina reconuschida?

L'ONU pina la sessiun da mez settember

■ (gsc) L'anteriu cuss. fed. Joseph Deiss, president da l'Assambla generala (AG) da l'ONU, avra la 66avla sessiun mardi, ils 13 da settember a las 15:00, ora locala da New York. L'urden dal di provisorii è cumpari ils 15 da fanadur; el cumpiglia 168 puncts. Blera gliעד en l'entir mund ha mirveglias dals puncts 35, 36 e 61. Nr. 35 tuna: «La situaziun en il Proxim Orient», nr. 36: «La dumonda da Palestina». Nr. 61 è bler pli lung: «La suveranità permanenta dal pievel palestinais en ils intschess occupads, inclus Gerusalem da l'ost, e da la populaziun araba dal Golan sirian, sin lur resursas naturalas». L'Israel occupa er il Golan (per arab Dschaulàn), situà sur la Mar da Galilea encunter l'ost. Dapi onns na fan ins nagin progress vers la pasch en il Proxim Orient. L'editorial dals 20 da fanadur en «Le Courier» (Genevra) punctuescha: «L'Israel ha la disa da respunder militarment a la protesta paschavla. Mintg'emna succedan manifestaziuns a Bilin ed auters vitgs da Cisjordania; latiers vegnan Palestinais mazzads e pacifists israelians ed internaziunals ferids. Duvrar l'armada cunter civilists senza armas, quai sumeglia a la tenuta dals protentats arabs che manifestaziuns han cupitgà u vulan cupitgar.» Mardi, ils 19 da fanadur han «set bartgas cun gruppas da cumbat e trais cun rachetas, en total 150 schul-

dads arrestà 16 umens senza armas sin ina bartga lunga da 16 m. Quella rapina en auas internaziunales era illegala» (info@plateforme-palestine.org). Ina lingia grossa en la «NZZ» dals 23 da fanadur (p. 6) tuna: «L'Israel sa retira en il refugi.»

## Negoziar tranter stadis

La vart araba perencunter ha instradà in'acziun da pasch. L'ONU duai examinar l'iniziativa da passa 120 pajais dal Proxim Orient, l'Africa, l'Asia e l'America latina, che pretendan la reconuschientscha uffiziala da la Palestina. Sche l'AG vuscha en chaussa, tge fan ils stadis europeics? Varsaquants paran indecis, per exempel la Frantscha, Germania, Gronda Britannia, Spagna ed il Portugal. Il politolog israelian Jossi Alpher (www.bitterlemons.org), anteriur collavuratur dal servetsch secret «Mossad», scriva: «L'unica strategia da primminister Netanyahu (...) è da segirar il veto american en il cussegl da segirezza (...) e prubar d'influenzar ils Europeans – tuttina adumbatten, cun l'excepciun da la Germania per motivs istorics (...). Ina resoluziun da l'ONU munta [per l'Israel] dapli isolaziun, dapli squitsch, boicots, forsa ina nova insurrezziun u tactics palestinaisas (...). Ma l'AG vegn a sa pronunziar per in stadi palestinais en ils cunfins da 1967, cun Ge-

rusalem [da l'ost] sco chapitala (...). Mia schliaziun fiss da negoziar sin il stgalim dals dus stadis; quai fiss bler pli simpel che cun in moviment da liberaziun che cumpiglia cunzunt fugitivs palestinais en la diaspora (...). Cun [Mahmud] Abbas sco president da stadi (...) pudess l'Israel prender per mauns immediat problems sco quels dals fugitivs u dals lieus sontgs)\*. Alpher ha gia preschentà quest plan al forum internaziunal per la segirezza, arranschà dals 30 da matg als 1. da zercladur da la Scola auta politecnica da Turitg. Dentant s'avischina la curaisma islamica; ella entschaiva quest onn il di da nossa Festa naziunala e vegn a fin cun ils trais dis da la festa finala (per arab «Aid al-Fitr») u Festa dal zutger (per tirc «Seker Bayrami») che cumenza ils 30 d'avust. Quel mais da gigina, mintga di tranter la levada dal sulegl ed il tramunt per umans sauns e creschids, fraina l'activitad usitada en pajais islamics; lur represchentants vegnan dentant a cumparair tant pli pronts a New York ils 13 da settember. Il Bumaun giudaic («Rosch ha-Schanà») ha lieu dal reminent pir la saira dals 28 da settember.

\*«Der Palästinaerstaat wird anerkannt werden», en: «Tachles» dals 1. da fanadur 2011, p. 25. Adressa: Postfach 1852, 8027 Turitg. Posta electronica: verlag@tachles.ch. Internet: www.tachles.ch.